



Sud Bosne i Hercegovine
Суд Босне и Херцеговине

Broj: S1 3 Iž 044147 22 Iž
Sarajevo, 18.10.2022. godine

Sud Bosne i Hercegovine u Sarajevu, u apelacionom vijeću sastavljenom od sudija Vesna Trifunović predsjednika vijeća, Dinke Bešlagić Čovrk i Srete Crnjaka članova vijeća, odlučujući o žalbi Armina Kukića kandidata ispred političke stranke Socijaldemokratska partija Bosne i Hercegovine, ulica Slobode, Bugojno, izjavljenoj protiv odluke Centralne izborne komisije Bosne i Hercegovine broj: 05-01-07-5-4167/22 od 11.10.2022. godine, o utvrđenoj odogovrnosti i novčanom kažnjavanju za kršenje odredbi Izbornog zakona BiH, u nejavnoj sjednici održanoj dana 18.10.2022. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je politička stranka Socijaldemokratska partija Bosne i Hercegovine odgovorna što je kandidat ove političke stranke Armin Kukić dana 1.10.2022. godine na svom Facebook profilu vodio izbornu kampanju u vrijeme trajanja izborne šutnje, čime je prekršio pravila ponašanja u periodu koji počinje 24 sata prije otvaranja biračkih mjesta i traje do njihovog zatvaranja iz člana 7.4 stav (1) tačka (3) Izbornog zakona BiH, pa joj je na osnovu člana 6.7 stav (1) i stav (2) tačka 1) i člana 19.9 stav (1) tačka 15 i stav (4) Izbornog zakona izrečena novčana kazna od 3.000,00 KM.

Odlukom je utvrđeno da je Armin Kukić kandidat ispred političke stranke Socijaldemokratske partije Bosne i Hercegovine odgovoran što je dana 01.10.2022. godine na svom Facebook profilu vodio izbornu kampanju u vrijeme trajanja izborne šutnje, čime je prekršio pravila ponašanja u periodu koji počinje 24 sata prije otvaranja biračkih mjesta i traje do njihovog zatvaranja iz člana 7.4 stav (1) tačka (3) Izbornog zakona BiH, pa mu je na osnovu člana 6.7 stav (1) i stav (2) tačka 1) i člana 19.9 stav (1) tačka 15 i stav (4) Izbornog zakona izrečena novčana kazna od 3.000,00 KM.

Protiv ove odluke Armin Kukić kandidat ispred političke stranke Socijaldemokratska partija Bosne i Hercegovine je blagovremeno uložio žalbu u

kojoj navodi da društvene mreže nisu taksativno pobrojane u Izbornom zakonu, a osim toga Facebook profil koristi i supruga kandidata, koja nije politički aktivna, pa je nejasno kako je CIK BiH utvrdila da je sporni komentar napisan od strane kandidata. Osim toga, sporna objava nije bila plaćena niti je bila javnog karaktera, već isključivo objava koju su mogla vidjeti određena lica tj. bliži krug prijatelja i članova porodice. Dalje navodi da neka sredstva za komunikaciju negdje ne smatraju mrežama, Konačno je predloženo da se žalba usvoji i pobijana odluka stavi van snage, ista odbaci, poništi ili vrati prvostepenom organu na ponovno postupanje.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu.

Žalba nije osnovana.

Iz stanja spisa proizilazi da je Centralna izborna komisija BiH dana 02.10.2022. godine zaprimila prigovor političke stranke Stranka demokratske akcije-SDA, a koji se odnosi na kršenje odredaba člana 7.3 stav (1) tačka 7) Izbornog zakona BiH, u kojem je navedeno da je kandidat političkog subjekta SDP Armin Kukić izvršio povredu člana 7.4 stav (1) tačka (3) Izbornog zakona BiH na način da je javno oglašavao na svom FB profilu u vrijeme trajanja izborne šutnje, dostavljajući u prilogu screenshot objave na društvenoj mreži Facebook.

U postupku ispitivanja formalno pravne strane prigovora, Centralna izborna komisija BiH je utvrdila da je isti blagovremeno podnesen.

Na navedenu inicijativu Socijaldemokratska partija Bosne i Hercegovine je dostavila izjašnjenje u kojem navodi da je mišljenje navedeno na privatnom profilu, nikako na javnom servisu za komunikaciju na način da bi moglo da utiče ili izmijeni volju birača na dan kada je zakonom određena izborna šutnja. Oglašavanje nije bilo sa zvanične stranice političke stranke niti sa zvanične stranice kandidata Kukić Armina, niti sa profila koji koristi isključivo taj kandidat, te da iz tih razloga smatra prigovor neosnovanim i da ga Centralna izborna komisija treba odbaciti.

Kandidat Armin Kukić u svojem izjašnjenju navodi da se radi o profilu zatvorenog tipa, te da nije stavljen na opciju „javno“, pa status nije bio dostupan široj masi, nego zatvorenom krugu ljudi koji su mu najbliži, te da ni na koji način nije mogao da utiče na odluku javnosti prilikom glasanja. Smatra prigovor pravno neosnovanim.

Uvidom u spis predmeta i dostavljene screenshot objave sa društvene mreže Facebook, Centralna izborna komisija BiH je utvrdila da je politička stranka Socijaldemokratska partija Bosne i Hercegovine odgovorna što je Armin Kukić kandidat ove političke stranke na Opšim izborima 2022. godine dana 01.10.2022. godine na svom Facebook profilu vodio izbornu kampanju u vrijeme trajanja izborne šutnje, odnosno u vrijeme kada je zabranjeno vođenje izborne kampanje i javno oglašavanje, čime je prekršio pravila ponašanja u periodu koji počinje 24 sata prije otvaranja biračkih mjesta i traje do njihovog zatvaranja.

Iz stanja spisa proizilazi da uvidom u sadržaj objave proizilazi nesporna činjenica da se radi o Facebook profilu na ime „Armin Kukić“, a iz same objave i teksta objave „Da li vam je i ovo u amanet ostavio rahmetli Alija Izetbegović? Građani Bugojna Gospodara je uz iskrene, zato sutra porazimo kriminalce, koji se kriju iza vjere! SDP do pobjede!!“ da sporna objava u svom opisu i sadržaju pokazuje

promociju političke stranke Socijaldemokratske partije BiH i kandidata te političke stranke, s ciljem informisanja i uticaja na birače u periodu kada je zabranjeno vođenje izborne kampanje i javnog oglašavanja u smislu člana 7.4 stav (1) tačka 3) Izbornog zakona BiH.

Paušalni su žalbeni navodi koji ukazuju na činjenicu da društvene mreže nisu taksativno pobrojane u Izbornom zakonu, kao i činjenica da se neka sredstva za komunikaciju negdje ne smatraju mrežama, jer upravo suprotno od navedenog Facebook mreže je jedna od najrasprostranjenijih i najpoznatijih internetskih društvenih mreža koja omogućava dvosmjernu interakciju putem sadržaja i komunikaciju koje generiraju korisnici, odnosno mediji dostupni na određenim platformama dizajniranim da korisnicima omoguće kreiranje sadržaja i interakciju s informacijama i njihovim izvorima u smislu odredbe člana 1.1a stav (1) tačka 19) Izbornog zakona BiH, zbog čega je i po shvatanju vijeća Centralna izborna komisija je pravilnom primjenom odredbe člana 7.4 stav (2) Izbornog zakona BiH utvrdila odgovornost političke stranke Socijaldemokratske partije Bosne i Hercegovine i kandidata ove političke stranke Kukić Armina za kršenje odredbe člana 7.4 stav (1) tačka 3) Izbornog zakona BiH u periodu od 24 sata prije otvaranja biračkih mjesta i traje do njihovog zatvaranja. U takvoj situaciji irelevantni su žalbeni navodi kojim se ukazuje da je profil bio zatvorenog tipa i dostupan užem krugu ljudi.

Prilikom odmjeravanja visine izrečene novčane kazne Centralna izborna komisija Bosne i Hercegovine je cijenila da je izrečena minimalna novčana kazna adekvatna učinjenom prekršaju i da će se njom ostvariti svrha kažnjavanja, na koji način su cijenjene sve okolnosti relevantne za određivanje visine novčane kazne.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

**PREDSJEDNIK VIJEĆA
S U D I J A**

Vesna Trifunović